

La Chasa Rumantscha en nova splendor

■ (anr/fa) La Chasa Rumantscha è vegnida erigida dal 1860–1865. Cunquai ch'i nun eran dapi la construcziun mai vegnidas fatgas modificaziuns pli grondas eri ussa daventà necessari da renovar la chasa. «La stad 1954 ha cumprà la Fundaziun Chasa Rumantscha (FCR) la chasa en la Via da la Ples-sur 47 cun ses conturn», ha infurmà il president da la FCR *Gion T. Deplazes* ier als represchentants dals meds da massa grischuns, «cun l'intent da la metter a disposiziun a las organisaziuns rumantschas, spezialmain a la Lia Rumantscha.» La renovaziun da l'edifizi ch'il cussegl da citad da Cuir ha qualificatgà

l'atun 1990 sco monument architectonic dign da vegnir mantegnì era daventada necessaria. La FCR sco possessura da l'edifizi erigì durant la segunda mesadad dal 19avel tschientaner ha incumbensà l'architect *Leo Deplazes* da Flem da planisar e manar questas lavurs. Ils custs da la renovaziun s'amuntan ad 1,3 miliuns francs, inclus lavurs da mantegniment da 200 000 francs. Quels ha surprendì la FCR senza impunder daners publics.

**«Senza donnagiar la
substanza architectonica»**

Urs Cadruvi, il secretari general da la LR,



Il plaun sutterranean serva sco archiv e sco magasin per la libreria da la LR.



L'anterior local da la scolina po vegnir utilisà uss sco local per scolaziuns u per producziuns culturalas.

FOTOS F. ANDRY

ha preschentà il resultat da questas lavurs da renovaziun: «La finamira da crear in ambient da lavur adattà per las 15 fin 17 persunas da la LR che lavuran adina qua en Chasa Rumantscha han ins cleramain cuntanschì», ha'l constatà. Uschia è vegnidas renovadas surtut las installaziuns electricas ed electronicas per satisfar al basegn actual da las tecnologias d'infurmaziun. Il plaun sutterranean nun aveva blers onns pli pudì vegnir utilisà cumplainamain causa l'umiditad: «L'architect ha schlià quest problem cun integrar en sia construcziun in cubus da lain distatgà dal plaun e da las paraids en ils arviets, uss pon ins duvrar quellas localitads sco magasin per la libreria ed era sco archiv», ha ditg Cadruvi.

**Chasa Rumantscha
duai daventar lieu d'inscunter**

Cunquai che la citad da Cuir ha surpi-

glià dal 2010 l'incumbensa da manar las scolinas rumantschas èn questas localitads vegnidas transformadas en stanzas da scolaziun e d'occurrènz. «Ellas stattan a disposiziun er ad interpresas ed organisaziuns externas», ha infurmà il secretari general. Ultra da las lavurs da renovaziun pli grondas èn stadas necessarias era diversas ulteriuras modificaziuns: Tranter auter han ins dà si a las paraids nova color, il stgaudament è vegnì remplazzà ed ils palantschieus da parchet èn vegnids renovads. Per simplifitgar la logistica entaifer la chasa, «i sa tracta da var 15 000 cudeschs e products ad onn», ha la FCR costruì in ascensur. Quel permetta enpli er in access simplifitgà a persunas en sutgas cun rodas.

**La Chasa Rumantscha
avra sias portas**

Venderdi e sonda envidan la Fundaziun

Chasa Rumantscha e la Lia Rumantscha tut las persunas interessadas als dis da las portas avertas. Ultra dal gir tras la chasa renovada, in'invista en las lavurs da la LR ed in refrestg pon las visitadras ed ils visitaders s'allegrar da la represchentaziun dal duo ad hoc *Sara Hermann* (Samedan) e *Roberto Chiriatti* (Turitg): Ensemen cun ils preschents vegnan els a scuvrir la Chasa Rumantscha en lur atgna moda. Enpli avra la LR quels dis in'installaziun dal designer *Patrick Rothmund* da Trun. Program: venderdi, ils 4 favrer da las 17.00–20.00: Gir tras la chasa, program artistic, aperitiv. A las 18.00 plets da Gion T. Deplazes, president da la FCR, e da *Vincent Augustin*, president da la LR. Sonda, ils 5 favrer da las 10.00–15.00: Gir tras la chasa, program artistic, aperitiv. A las 13.00 plets da Gion T. Deplazes e da Vincent Augustin.